



Broj/Broj: 01/a – 50 – 1 – 15 - 72/10  
Sarajevo/Sarajevo: 17.2.2010.

**ZAPISNIK**  
**72. sjednice Predstavničkog doma**  
**Parlamentarne skupštine Bosne i Hercegovine,**  
**održane 17. 2. 2010. godine**

Sjednica je počela u 10 sati. Prisustvovalo je 39 poslanika.

Opravdano su odsustvovali: Sead Jamakosmanović, Šemsudin Mehmedović i Mehmed Suljkanović.

Iz Vijeća ministara BiH sjednici su prisustvovali: zamjenica ministra odbrane Marina Pendeš i pomoćnik ministra pravde BiH Mustafa Bisić.

Iz međunarodnih organizacija sjednicu su pratili predstavnici: OHR-a, OSCE-a, EUSR-a, USAID PSP-a i Centra civilnih inicijativa.

U okviru prethodnih pitanja, predsjedavajući Milorad Živković informirao Dom da je Denis Bećirović dostavio „Rezoluciju o važnosti osude genocida u Srebrenici i ratnih zločina u Bosni i Hercegovini za izgradnju trajnog mira“. U skladu s članom 148. stav (2) Poslovnika Doma, potrebno je da se Dom, u okviru prethodnih pitanja, izjasni da li da se Rezolucija uputi u nadležnu komisiju.

Predsjedavajući je stavio ovaj prijedlog na glasanje, te je Dom, s 31 glas „za“ (iz Federacije BiH 18, iz Republike Srpske 13), bez glasova „protiv“ i jednim „suzdržanim“ glasom, odlučio da se Rezolucija uputi nadležnoj komisiji.

Nakon što je kratko upoznao Dom sa izmjenama dnevnog reda, predsjedavajući je otvorio raspravu o dnevnom redu.

U raspravi je učestvovao Zlatko Lagumdžija.

Predsjedavajući je konstatirao da 72. sjednica Predstavničkog doma ima sljedeći

**DNEVNI RED**

1. Usvajanje Zapisnika 71. sjednice Predstavničkog doma;
2. Poslanička pitanja:
  - a) Komentari na dobivene odgovore,
  - b) Nova poslanička pitanja,
3. Zahtjev poslanika Sefera Halilovića za razmatranje Prijedloga zakona o izmjenama i dopunama Zakona o službi u Oružanim snagama Bosne i Hercegovine po hitnom postupku, u skladu s članom 127. Poslovnika, zakon broj: 01 – 02 - 8 - 22/10, od 16. 2 2010.,
4. Prijedlog zakona o izmjenama i dopunama Zakona o politici direktnih stranih ulaganja u Bosni i Hercegovini, predlažać: Vijeće ministara BiH, zakon broj: 01, 02 – 02 – 4 –

- 115/ 09, od 9. 12. 2009. (drugo čitanje) - odgođeno izjašnjavanje na nastavku 71. sjednice Doma, održanom 10.2.2010.,
5. Prijedlog zakona o primjeni rezultata analize dezoksiribonukleinske kiseline u sudskim postupcima, predlagač: Vijeće ministara BiH, zakon broj: 01,02-02-5-9/10, od 25.1.2010. (prvo čitanje),
  6. Prijedlog zakona o izmjenama i dopunama Zakona o radu u institucijama Bosne i Hercegovine, predlagač: Vijeće ministara BiH, zakon broj: 01,02-02-7-11/10, od 28.1.2010. (prvo čitanje),
  7. Prijedlog zakona o osiguranju proporcionalne etničke zastupljenosti u organima uprave i lokalne samouprave u Bosni i Hercegovini, predlagač: poslanik Bakir Izetbegović, zakon broj: 01 – 02 – 9 - 6/10, od 19.1.2010. (prvo čitanje),
  8. Prijedlog zakona o sprečavanju nereda na sportskim takmičenjima, predlagač: poslanik Bakir Izetbegović, zakon broj: 01 – 02 – 7 - 7/10, od 19. 1. 2010. (prvo čitanje),
  9. Izvještaj komisije Kolegija o nastojanju za postizanje saglasnosti o Prijedlogu zakona o izmjeni i dopunama Zakona o carinskoj politici Bosne i Hercegovine (zakon u prvom čitanju),
  10. Informacija o stanju u vezi s neblagovremenim upućivanjima pravosnažno osuđenih lica na izdržavanje kazni zbog nedovoljnog kapaciteta ustanova za izdržavanje kazni zatvora i mjere sigurnosti (prijedlog za razmatranje: Ustavnopravna komisija, materijali Ministarstva pravde BiH),
  11. Prijedlog zaključka o osnivanju Privremene komisije za pripremu prijedloga zakona o popisu stanovništva, domaćinstava i stanova u Bosni i Hercegovini 2011. (u skladu sa usvojenom inicijativom poslanika Branka Dokića s nastavka 71. sjednice Doma, održanom 10.2.2010.),
  12. Izbor tri člana Upravnog odbora Agencije za razvoj visokog obrazovanja i osiguravanje kvaliteta na period od tri godine (prijedlog jedinstvene rang-liste kandidata Privremene zajedničke komisije oba doma PSBiH broj: 01,02-50-1-49-5/10, od 18.1.2010.) – odgođeno izjašnjavanje na nastavku 71. sjednice Doma, održanom 10.2.2010.,
  13. Davanje saglasnosti za ratifikaciju:
    - a) Ugovora između Bosne i Hercegovine i Republike Slovenije o pravnoj pomoći u građanskim i krivičnim stvarima,
    - b) Protokola između Vijeća ministara BiH i Vlade Kraljevine Saudijske Arabije o međusobnoj zamjeni nekretnina - zemljišta za izgradnju diplomatskih predstavništava u Sarajevu i Rijadu.

### **Ad.1. Usvajanje Zapisnika 71. sjednice Predstavničkog doma**

Nije bilo rasprave o Zapisniku.

Zapisnik 71. sjednice usvojen je s 35 glasova „za“ (iz Federacije BiH 22, iz Republike Srpske 13), jednim glasom „protiv“ i bez „suzdržanih“ glasova.

### **Ad.2. Poslanička pitanja:**

**a) Komentari na dobivene odgovore**

**b) Nova poslanička pitanja**

Predsjedavajući Živković konstatirao je da su od prošle do ove sjednice odgovore na postavljena pitanja dobili:

1. Mehmed Suljkanović – od Ministarstva sigurnosti BiH, na pitanje postavljeno na 70. sjednici i Vijeća ministara BiH, na inicijativu upućenu na 30. sjednici
2. Šemsudin Mehmedović – od Upravnog odbora JRT sistema BiH, na pitanje postavljeno na 66. sjednici
3. Željko Kuzmanović – od RAK-a, na pitanje postavljeno na 70. sjednici i od Vijeća ministara BiH, na pitanje postavljeno na 69. sjednici
4. Martin Raguž, Mirko Okolić i Milorad Živković – od Vijeća ministara BiH, na pitanje postavljeno na 66. sjednici
5. Remzija Kadrić i Rifat Dolić - od Vijeća ministara BiH, na pitanje postavljeno na 60. sjednici
6. Niko Lozančić - od Vijeća ministara BiH, na pitanje postavljeno na 70. sjednici
7. Husein Nanić – od Centra za uklanjanje mina, na pitanje postavljeno na 70. sjednici

#### **a) Komentari na dobivene odgovore**

Odgovore su komentirali Husein Nanić i Martin Raguž.

#### **b) Nova poslanička pitanja**

Postavljena su nova poslanička pitanja kako slijedi:

##### **Velimir Jukić**

„Šta se preduzima u rasvjetljavanju svih okolnosti i utvrđivanju činjenica u vezi s višegodišnjom nezakonitom eksploatacijom i prodajom mineralne sirovine boksita na području općina Posušje i Široki Brijeg?“

Prema dostupnim informacijama, „nepoznati“ počinioci su u posljednjih nekoliko godina „iskopali“ i prodali oko 200 tisuća tona boksita i od prodaje oprihodovali preko 10 miliona KM (u ove količine nije uračunata proizvodnja Rudnika boksita Posušje i Široki Brijeg.“

##### **Rifat Dolić**

1. „Na koji način i kome se podnose prigovori na rad printanih medija i novinara u situacijama kada printani medij izlazi u inozemstvu na jezicima naroda BiH, a novinar boravi i piše iz BiH i o događanjima u BiH?“
2. „Kakva je zakonska procedura do donošenja konačnih odluka o finansijskom zaduživanju općina, kantona i drugih institucija vlasti u BiH kod komercijalnih banaka i drugih finansijskih institucija i kakvi su zakonski mehanizmi za reviziju i ocjenu opravdanosti takvog zaduživanja, s obzirom na činjenicu da se ovakva zaduživanja sve češće koriste za finansiranje izbornih programa i projekata bez ekonomske opravdanosti i za pokrivanje budžetskih dubioza koje su rezultat neodgovornog raspolaganja budžetskim sredstvima?“

##### **Sadik Bahtić**

„Da li je tačno da se na spisku lica koja su prijatelja nacionalnoj sigurnosti države BiH nalaze pripadnici samo jednog naroda – Muslimani (domaći i strani) ?“

##### **Remzija Kadrić**

1. „Kakav je status TV predajnika Jablanica kod Bijeljine, ko, pod kojim uslovima i na osnovu kojih propisa koristi taj predajnik?“

2. „Da li je projektom „Cijevna I i II“ ispoštovana sva potrebna procedura predviđena zakonom o koncesijama i drugim propisima i da li je pomenutim projektom predviđeno izmiještanje riječnog korita na lijevu stranu na obradivo poljoprivredno zemljište mještana Bošnjaka u Mjesnoj zajednici Kotorsko-općina Doboj?“

### **Denis Bećirović**

1. „Koliko je Ministarstvo za ljudska prava i izbjeglice u Vijeću ministara BiH od 1. januara 2007. do 1. februara 2010. godine planiralo usvojiti zakona i koliko je tačno usvojeno zakona na sjednicama Vijeća ministara BiH? “
2. „Koliko je Ministarstvo vanjskih poslova BiH od 1. januara 2007. do 1. februara 2010. godine planiralo usvojiti zakona i koliko je tačno usvojeno zakona na sjednicama Vijeća ministara BiH? “
3. „Koliko je Ministarstvo finansija i trezora BiH od 1. januara 2007. do 1. februara 2010. godine planiralo usvojiti zakona i koliko je tačno usvojeno zakona na sjednicama Vijeća ministara BiH? “
4. „Koliko je Ministarstvo civilnih poslova BiH od 1. januara 2007. do 1. februara 2010. godine planiralo usvojiti zakona i koliko je tačno usvojeno zakona na sjednicama Vijeća ministara BiH? “
5. „Koliko je Ministarstvo komunikacija i prometa BiH od 1. januara 2007. do 1. februara 2010. godine planiralo usvojiti zakona i koliko je tačno usvojeno zakona na sjednicama Vijeća ministara BiH? “
6. „Koliko je Ministarstvo pravde BiH od 1. januara 2007. do 1. februara 2010. godine planiralo usvojiti zakona i koliko je tačno usvojeno zakona na sjednicama Vijeća ministara BiH?“
7. „Koliko je Ministarstvo sigurnosti BiH od 1. januara 2007. do 1. februara 2010. godine planiralo usvojiti zakona i koliko je tačno usvojeno zakona na sjednicama Vijeća ministara BiH? “
8. „Koliko je Ministarstvo odbrane BiH od 1. januara 2007. do 1. februara 2010. godine planiralo usvojiti zakona i koliko je tačno usvojeno zakona na sjednicama Vijeća ministara BiH? “

### **Husein Nanić**

„Sredstva informiranja objavila su informaciju o aktivnostima na izgradnji puta od ušća Lašve do Donjeg Vakufa.

Postavljam pitanje i tražim odgovor od Ministarstva o trenutnim aktivnostima na tom projektu i planovima na tom projektu, te da li postoje planovi za izgradnju preostalog dijela puta od Donjeg Vakufa do Bihaća?“

### **Mirko Okolić**

1. „Da li je upravna inspekcija Ministarstva pravde BiH ikada do sada izvršila kontrolu zakonitosti sklapanja ugovora o djelu ili radu na određeno vrijeme u Ministarstvu sigurnosti? Ako jeste, da mi dostavi informaciju o rezultatima te inspekcije. Ako nije, predlažem da to hitno učini i o nalazima upravne inspekcije, te da me o imenima i funkcijama odgovornih obavijesti. “
2. „Koliko lica u Ministarstvu sigurnosti BiH trenutno radi po ugovoru o djelu ili radu, na kojim poslovima i kakva je nacionalna struktura tih lica? Tražim da mi se dostavi pregled svih ugovora o djelu ili o radu u protekle tri godine, po nacionalnoj strukturi, s obrazloženjem zašto su imali prijeku potrebu za zaključivanje takvih ugovora. “

### **Lazar Prodanović**

„Molim da mi odgovorite koji sve projekti su finansirani iz sredstava Fonda za povratak tokom 2009. godine, u kojoj vrijednosti, u kojim općinama i ko su bili izvođači radova? “

### **Azra Alajbegović**

„Zašto su građani BiH koji izvade pasoš u inozemstvu diskriminirani u odnosu na građane BiH koji izvade CIPS ličnu kartu u BiH po pitanju prava na pasivnu registraciju u centralni birački spisak? “

### **Branko Dokić**

„Zašto Vijeće ministara BiH odštetni zahtjev porodice Starovlah nije riješilo diplomatskim sredstvima s predstavnicima NATO-a i zašto je Ministarstvo vanjskih poslova BiH prihvatilo jednostranu odluku NATO-a po kojem se odštetni zahtjev porodice Starovlah odbija? “

### **Vinko Zorić**

„Kako je moguće da nekih lica nema u evidencijama poreske uprave iako imaju ličnu kartu, jedinstveni matični broj a ured CIPS-a u njihovoj matičnoj općini tvrdi da je sve u redu, a isto tako i nadležna agencija? Je li moguće da je za takve propuste poreske uprave odgovorna stranka koja ima sve potrebne dokumente? Ko su odgovorni? “

### **Adem Huskić**

1. Koje banke vrše platni promet za institucije BiH?
2. Koliki su troškovi platnog prometa u 2008. i 2009. godini?
3. Da li je usluga platnog prometa vršena prema ZJN?

Molim da mi se dostave podaci o svim bankama i iznosima pojedinačno za 2008. i 2009. godinu.

### **Zlatko Lagumdžija**

„Kada i kako će biti sankcionirani odgovorni za neizvršenje Zaključka Parlamentarne skupštine BiH povodom pronalaženja povoljnih kreditnih aranžmana za finansiranje i realizaciju projekta povratka izbjeglih i raseljenih lica, te kako, kada i do kada će Vijeće ministara BiH realizirati usvojeni zaključak Parlamentarne skupštine BiH? “

### **Ad.3. Zahtjev poslanika Sefera Halilovića za razmatranje Prijedloga zakona o izmjenama i dopunama Zakona o službi u Oružanim snagama Bosne i Hercegovine po hitnom postupku, u skladu s članom 127. Poslovnika, zakon broj: 01 – 02 - 8 - 22/10, od 16. 2 2010.**

Predsjedavajući je dao kratke uvodne napomene. Sefer Halilović obrazložio je svoj zahtjev za razmatranje Prijedloga zakona po hitnom postupku. U raspravi su učestvovali: Azra Hadžiahmetović, Šefik Džaferović, Slavko Matić, Milorad Živković, Salko Sokolović, Savo Erić, Bakir Izetbegović i zamjenica ministra odbrane Marina Pendeš.

S obzirom da je u toku rasprave predlagatelj odustao od zahtjeva za razmatranje Prijedloga zakona po hitnom postupku, Dom se izjašnjavao o tome da se Prijedlog zakona razmatra po skraćenom postupku, u skladu s članom 126. Poslovnika Doma.

Dom je, s 32 glasa „za“ (iz Federacije BiH 21, iz Republike Srpske 11), bez glasova „protiv“ i tri „suzdržana“ glasa, usvojio zahtjev da se Prijedlog zakona o izmjenama i dopunama Zakona o službi u Oružanim snagama Bosne i Hercegovine razmatra po skraćenom postupku.

Sefer Halilović predložio je sljedeći zaključak:

**„Obavezuje se Ministarstvo odbrane BiH da produži Ugovor o profesionalnoj vojnoj službi pripadnicima Oružanih snaga BiH (OSBiH) do okončanja parlamentarne procedure u vezi s Prijedlogom zakona o izmjenama i dopunama Zakona o službi u Oružanim snagama BiH“.**

Predsjedavajući je rekao da je Kolegij Doma izvršio konsultacije, te je odlučio da se ovaj zaključak ne može staviti na glasanje s obzirom da derogira Zakon.

**Ad.4. Prijedlog zakona o izmjenama i dopunama Zakona o politici direktnih stranih ulaganja u Bosni i Hercegovini, predlagač: Vijeće ministara BiH, zakon broj: 01, 02 – 02 – 4 – 115/ 09, od 9. 12. 2009. (drugo čitanje) - odgođeno izjašnjavanje na nastavku 71. sjednice Doma, održanom 10.2.2010.**

Milorad Živković dao je kratke uvodne napomene. Rekao je da je Klub poslanika SNSD-a, u skladu s članom 118 st. (1) i (3), uložio dva amandmana koji su tehničke prirode. U raspravi su učestvovali: Slavko Jovičić, Slavko Matić, Bajazit Jašarević i Adem Huskić.

Zatim se Dom izjašnjavao o amandmanima Kluba poslника SNSD-a koji glase:

#### **Amandman I.**

Briše se Amandman I. koji je usvojila Komisija za vanjsku trgovinu i carine.

#### **Amandman II.**

U članu 3. Zakona o izmjenama i dopunama Zakona o politici direktnih stranih ulaganja u BiH (a koji tretira član 4. Zakona):

Stav (f) mijenja se i glasi:

„(f) Vlada entiteta može donijeti odluku, ako ocijeni opravdanim, da ulog stranog lica kod određenih privrednih društava iz stava (a) ovog člana, osim preduzeća koja se bave javnim informiranjem, ne podliježu restrikciji navedenoj u stavu (a) ovog člana.“

**Amandman I.** usvojen je s 31 glasom „za“ (iz Federacije BiH 17, iz Republike Srpske 14), bez glasova „protiv“ i pet „suzdržanih“ glasova.

**Amandman II.** usvojen je s 33 glasa „za“ (iz Federacije BiH 19, iz Republike Srpske 14), bez glasova „protiv“ i četiri „suzdržana“ glasa.

Na kraju je Dom jednoglasno, s 35 glasova „za“ (iz Federacije BiH 21, iz Republike Srpske 14), usvojio Zakon o izmjenama i dopunama Zakona o politici direktnih stranih ulaganja u Bosni i Hercegovini u drugom čitanju.

**Ad.5. Prijedlog zakona o primjeni rezultata analize dezoksiribonukleinske kiseline u sudskim postupcima, predlagač: Vijeće ministara BiH, zakon broj: 01,02-02-5-9/10, od 25.1.2010. (prvo čitanje)**

Predsjedavajući Živković dao je uvodne napomene, nakon čega su u raspravi učestvovali: Šefik Džaferović, Remzija Kadrić, Azra Alajbegović i Niko Lozančić.

Prijedlog zakona usvojen je u prvom čitanju jednoglasno, s 37 glasova „za“ (iz Federacije BiH 23, iz Republike Srpske 14).

**Ad.6. Prijedlog zakona o izmjenama i dopunama Zakona o radu u institucijama Bosne i Hercegovine, predlagač: Vijeće ministara BiH, zakon broj: 01,02-02-7-11/10, od 28.1.2010. (prvo čitanje)**

Nakon kratkih uvodnih napomena predsjedavajućeg, u raspravi su učestvovali: Beriz Belkić, Remzija Kadrić, Bakir Izetbegović, Šefik Džaferović, Husein Nanić, Azra Hadžiahmetović, Milorad Živković, Momčilo Novaković, Bajazit Jašarević, Drago Kalabić, Adem Huskić i Selim Bešliagić.

Selim Bešliagić predložio je sljedeći zaključak:

**„ Predlaže se da se Prijedlog zakona o izmjenama i dopunama Zakona o radu u institucijama Bosne i Hercegovine uputi Direkciji za evropske integracije na davanje mišljenja o tome da li je taj prijedlog zakona u duhu propisa EU. Predlaže se da se o ovom materijalu obavi javna rasprava.“**

Dom se prvo izjašnjavao o Prijedlogu zakona koji je usvojen u prvom čitanju, s 34 glasa „za“ (iz Federacije BiH 22, iz Republike Srpske 12), bez glasova „protiv“ i dva „suzdržana“ glasa.

Predstavnički dom usvojio je i zaključak Selima Bešliagića jednoglasno, s 37 glasova „za“ (iz Federacije BiH 23, iz Republike Srpske 14).

**Ad.7. Prijedlog zakona o osiguranju proporcionalne etničke zastupljenosti u organima uprave i lokalne samouprave u Bosni i Hercegovini, predlagač: poslanik Bakir Izetbegović, zakon broj: 01 – 02 – 9 - 6/10, od 19.1.2010. (prvo čitanje)**

Milorad Živković dao je kratke uvodne napomene. U raspravi su učestvovali: Bakir Izetbegović, Martin Raguž, Rifat Dolić, Mirko Okolić, Milica Marković, Azra Alajbegović, Husein Nanić, Slavko Jovičić, Denis Bećirović, Šefik Džaferović, Milorad Živković, Remzija Kadrić, Branko Dokić, Adem Huskić, Momčilo Novaković, Velimir Jukić, Beriz Belkić, Niko Lozančić, Slavko Matić, Sadik Bahtić i Sefer Halilović.

Za“ Prijedlog zakona glasala su 24 poslanika (iz Federacije BiH 22, iz Republike Srpske dva), „protiv“ je glasalo 12 poslanika a jedan je bio „suzdržan“. Predsjedavajući je konstatirao da nema potrebne entitetske većine, pa je Kolegij odmah proveo usaglašavanje. Kako nije postignuta saglasnost, prešlo se u drugi krug glasanja.

U drugom krugu, „za“ su glasala 24 poslanika (iz Federacije BiH 22, iz Republike Srpske dva), „protiv“ je glasalo 12 (iz Republike Srpske), a jedan je bio „suzdržan“. Predsjedavajući je konstatirao da je Prijedlog zakona odbijen u prvom čitanju.

**Ad.8. Prijedlog zakona o sprečavanju nereda na sportskim takmičenjima, predlagač: poslanik Bakir Izetbegović, zakon broj: 01 – 02 – 7 - 7/10, od 19. 1. 2010. (prvo čitanje),**

Nakon kratkih uvodnih napomena predsjedavajućeg, u raspravi je učestvovao Bakir Izetbegović.

"Za" Prijedlog zakona glasalo je 25 poslanika (iz Federacije BiH 23, iz Republike Srpske dva), „protiv“ je glasalo 11, a jedan je bio „suzdržan“. Predsjedavajući je konstatirao da nema dovoljne entitetske većine, te da će se Kolegij kao komisija pokušati usaglasiti u roku od tri dana, o čemu će obavijestiti Dom.

**Ad.9. Izvještaj komisije Kolegija o nastojanju za postizanje saglasnosti o Prijedlogu zakona o izmjeni i dopunama Zakona o carinskoj politici Bosne i Hercegovine (zakon u prvom čitanju)**

Predsjedavajući Živković dao je kratke uvodne napomene. Nije bilo rasprave.

Prijedlog zakona usvojen je u prvom čitanju s 23 glasa „za“ (iz Federacije BiH 21, iz Republike Srpske dva), bez glasova „protiv“ i 14 „suzdržanih“ glasova.

**Ad.10. Informacija o stanju u vezi s neblagovremenim upućivanjima pravosnažno osuđenih lica na izdržavanje kazni zbog nedovoljnog kapaciteta ustanova za izdržavanje kazni zatvora i mjere sigurnosti (prijedlog za razmatranje: Ustavnopravna komisija, materijali Ministarstva pravde BiH)**

Milorad Živković dao je kratke uvodne napomene. U raspravi su učestvovali: Šefik Džaferović, Sadik Bahtić, Azra Alajbegović, Beriz Belkić i pomoćnik ministra pravde BiH Mustafa Bisić.

Predstavnički dom je, s 31 glasom „za“ (iz Federacije BiH 19, iz Republike Srpske 12), bez glasova „protiv“ i četiri „suzdržana“ glasa, primio k znanju Informaciju i usvojio zaključke sadržane u Informaciji koji glase:

1. **Prima se k znanju Informacija Ministarstva pravde BiH o stanju u vezi s nepravovremenim upućivanjem pravomoćno osuđenih lica na izdržavanje kazne zbog nedovoljnog kapaciteta ustanova za izdržavanje kazni zatvora i mjera sigurnosti.**
2. **Daje se podrška jačanju i reformi zatvorskog sistema i sistema izvršenja krivičnih sankcija u Bosni i Hercegovini.**
3. **Daje se podrška osnivanju Specijalne ustanove za forenzičku psihijatriju „Sokolac“, te konačnom potpisivanju Prijedloga sporazuma o smještaju i naknadi trškova za izvršenje mjera sigurnosti izrečenih u krivičnom postupku i u drugom postupku u kojem se izriče mjera liječenja.**
4. **Daje se podrška aktivnostima koje preduzima Ministarstvo pravde BiH na izgradnji državnog zatvora.**
5. **Daje se podrška materijalnom i kadrovskom proširenju i jačanju Sektora za izvršenje krivičnih sankcija u Bosni i Hercegovini.**

Zatim se Dom izjašnjavao o prijedlogu zaključka Šefika Džaferovića koji glasi:

**„Zadužuje se Vijeće ministara BiH da sastavi i u parlamentarnu proceduru uputi cjelovitu informaciju o stanju izvršenja kazni zatvora, mjera sigurnosti i odgojno-popravnih mjera u BiH. Informacijom je naročito potrebno obuhvatiti sistem ustanova za izvršenje, mjere za poboljšanje postojećeg stanja i planove budućih aktivnosti. Informacijom je također potrebno obuhvatiti pitanje broja lica, po vrstama krivičnih djela i izrečenim sankcijama, koje nisu upućene na izdržavanje zbog nedostatka kapaciteta.“**

Zaključak je usvojen s 32 glasa „za“ (iz Federacije BiH 20, iz Republike Srpske 12), bez glasova „protiv“ i četiri „suzdržana“ glasa.

**Ad.11. Prijedlog zaključka o osnivanju Privremene komisije za pripremu prijedloga zakona o popisu stanovništva, domaćinstava i stanova u Bosni i Hercegovini 2011. (u skladu sa usvojenom inicijativom poslanika Branka Dokića s nastavka 71. sjednice Doma, održanom 10.2.2010.)**



Milorad Živković rekao je da je Branko Dokić dostavio prijedlog zaključka o osnivanju Privremene komisije za pripremu prijedloga zakona o popisu stanovništva, domaćinstava i stanova u Bosni i Hercegovini 2011., u skladu s inicijativom usvojenom na nastavku 71. sjednice Doma, te da je Kolegij u proširenom sastavu predložio da se za članove Privremene komisije imenuju: Halid Genjac, Azra Hadžiahmetović, Milica Marković, Mirjana Malić, Velimir Jukić, Martin Raguž, Mirko Okolić, Branko Dokić, Ljiljana Milašin, Sefer Halilović, Rifat Dolić, Jerko Ivanković i Momčilo Novaković. U raspravi su učestvovali: Momčilo Novaković, Azra Hadžiahmetović, Branko Dokić, Mirko Okolić, Adem Huskić, Bajazit Jašarević i Selim Bešliagić.

Azra Hadžiahmetović i Momčilo Novaković predložili su sljedeći zaključak:

**„Sve odluke u Komisiji donosit će se dvotrećinskom većinom glasova onih koji su prisutni i glasaju.“**

Predstavnički dom jednoglasno je usvojio zaključak, s 37 glasova „za“ (iz Federacije BiH 23, iz Republike Srpske 14).

Zatim je, s 36 glasova „za“ (iz Federacije BiH 22, iz Republike Srpske 14), jednim glasom „protiv“ i bez „suzdržanih“ glasova, Dom usvojio izmijenjeni Zaključak o osnivanju Privremene komisije za pripremu prijedloga zakona o popisu stanovništva, domaćinstava i stanova u Bosni i Hercegovini 2011.

**Ad.12. Izbor tri člana Upravnog odbora Agencije za razvoj visokog obrazovanja i osiguravanje kvaliteta na period od tri godine (prijedlog jedinstvene rang-liste kandidata Privremene zajedničke komisije oba doma PSBiH broj: 01,02-50-1-49-5/10, od 18.1.2010.) – odgođeno izjašnjavanje na nastavku 71. sjednice Doma, održanom 10.2.2010.**

Predsjedavajući je dao uvodne napomene, nakon čega nije bilo rasprave.

Predstavnički dom izjašnjavao se o svakom kandidatu pojedinačno.

S 23 glasa „za“ (iz Federacije BiH 13, iz Republike Srpske 10), dva glasa „protiv“ i 12 „suzdržanih“ glasova, Dom je izabrao Aidu Abadžić Hodžić za člana Upravnog odbora Agencije.

S 27 glasova „za“ (iz Federacije BiH 16, iz Republike Srpske 11), tri glasa „protiv“ i pet „suzdržanih“ glasova, Dom je izabrao Vladu Majstorovića za člana Upravnog odbora Agencije.

S 32 glasa „za“ (iz Federacije BiH 18, iz Republike Srpske 14), tri glasa „protiv“ i dva „suzdržana“ glasa, Dom je izabrao Miljana Popića za člana Upravnog odbora Agencije.

**Ad.13. Davanje saglasnosti za ratifikaciju:**

- a) **Ugovora između Bosne i Hercegovine i Republike Slovenije o pravnoj pomoći u građanskim i krivičnim stvarima,**
- b) **Protokola između Vijeća ministara BiH i Vlade Kraljevine Saudijske Arabije o međusobnoj zamjeni nekretnina - zemljišta za izgradnju diplomatskih predstavništava u Sarajevu i Rijadu.**

Predsjedavajući Milorad Živković podsjetio je da je nadležna Komisija za vanjske poslove dala pozitivno mišljenje o sporazumima, nakon čega nije bilo rasprave.

Dom je, s 35 glasova "za" (iz Federacije BiH 22, iz Republike Srpske 13), bez glasova „protiv“ i jednim „suzdržanim“ glasom, dao saglasnost za ratifikaciju Ugovora između Bosne i Hercegovine i Republike Slovenije o pravnoj pomoći u građanskim i krivičnim stvarima.

S 33 glasa "za" (iz Federacije BiH 22, iz Republike Srpske 11), bez glasova „protiv“ i jednim „suzdržanim“ glasom, Dom je dao saglasnost za ratifikaciju Protokola između Vijeća ministara BiH i Vlade Kraljevine Saudijske Arabije o međusobnoj zamjeni nekretnina - zemljišta za izgradnju diplomatskih predstavništava u Sarajevu i Rijadu.

Time je realiziran dnevni red.

Na kraju je predsjedavajući napomenuo da je u pauzi sjednice Kolegij u proširenom sastavu održao sjednicu na kojoj je odlučeno da se u utorak, 2.3.2010., u 11 sati, održi sjednica Predstavničkog doma sa samo jednom tačkom dnevnog reda koja bi glasila:

Informacija Vijeća ministara BiH o akciji „Svjetlost“, izvedenoj 2.2.2010., i daljnjim aktivnostima. Također, na sjednici će se obratiti i predsjednik Parlamentarne skupštine Vijeća Evrope Mevlüt Çavuşoğlu. Odlučeno je i da se s Domom naroda pokuša dogovoriti da to bude plenarna sjednica oba doma.

Sjednica završena u 17, 25 sati.

Sastavni dio Zapisnika je transkript 72. sjednice Predstavničkog doma.

SEKRETAR  
PREDSTAVNIČKOG DOMA  
**Branka Todorović**

PREDSJEDAVAJUĆI  
PREDSTAVNIČKOG DOMA  
**dr. Milorad Živković**